

E P I T O M E.

Ingens exarsit inter Paullum V. Pontificem & Venetos contentio, cum Pontifex, ut Veneti leges suas abrogarent, atque eorum magistratus a clericis manus absternerent, postularet, contra Veneti jura sua acerrime tuerentur. Marinus interea Grimanus, Reipublicae Princeps, fato functus est, ac Leonardus Donatus ad principatum elatus. Ad Pontificem extra ordinem legatus est Petrus Duodus, eique in mandatis datum, ut, quod saepe ante per literas perque Nanium, ordinarium oratorem, factitatum pariter fuerat, & propensam erga ipsum Reipublicae voluntatem Pontifici significaret, & quae essent Reipublicae jura, eundem doceret. Paulo nihilominus intentatum ecclesiasticum fulmen intorquere placuit. Ducem ac Senatum a fidelium coetu sejunxit; universae Venetae ditioni sacris interdixit. Nequis vero intra Veneti imperii fines pontificias literas evulgare auderet, simul ne quas concitata plebs turbas daret, maxima solertia, classe etiam & terrestribus copiis auctis, cautum est. Tum sparsis in vulgus libellis, utrimque entbymematis certatum; deinde res ad justum bellum spectare visa est. Delectus utrimque habitus, ceterique apparatus facti. Universis tamen Europae Principibus in id intentis, ut priori amicitia Venetorum & Pontificis animi coalescerent, tandem Jozeusae Cardinalis, cui id Galliae Rex mandaverat, potissimum opera, unanimi Pontificis & Venetorum consensu, lis omnis dirempta, atque amice composita est.